

Piremon

Piä watä äma jopi kubä Anututa biŋam täŋkuko unitäŋo manbiŋam

1-2 ✨ ✨ Näk Pol Kristota yänpäŋ komi eniken nepmaŋpani näkä, ba notninpak Timoti-kät man kudän ŋo takamäk. Man ŋowä ŋodeta kudän takamäk; Notninpak Piremon, ninkät piä mebäri kubägän täŋpani gäka, ba wanotnin Apia unita, ba notninpak Akipas, Anututa yänpäŋ ämik bok täŋpani unita. Ba äbot täŋpani ämawebe Anutu iniŋ oretta Piremontä eniken ärok takäŋ unita imaka man ŋo kudän takamäk. Täŋpäkaŋ in kuduŋta ŋode täwetkamäk;

3 ✨ Anutu Nanin-kät Ekäni Jesu Kristo unitä iron täŋ tamiŋirän iniken bänep kwini terak kaŋ kuŋarut.

Pol Piremonta bänep täga nadäŋkuk

4 ✨ Eruk, Piremon, gäkaŋo manbiŋam ŋode nadäk täyat unita näk kadäni kadäni Anutu-ken yäŋapik man yäŋkaŋ gäka bänep täga man iwet täyat.

5 Gäk Ekäni Jesu ba Anutu täŋo kudupi ämawebe unita gäripi nadänpäŋ nadäŋ yämikinik täŋiri manbiŋamka nadäk täyat.

6 ✨ Täŋpäkaŋ näk gäka Anutu-ken ŋode imaka yäŋapik täyat; Gäk ba nin nadäkiniknin terak yänpäŋ-nadäk säkgämän bok tak takamäŋ unitä nadäk-nadäka piräreŋ gamiŋirän iron kädet täga

✨ **1:1-2:** Efe 3:1 ✨ **1:1-2:** Kol 4:17, 2Ti 2:3 ✨ **1:3:** Gal 1:3 ✨ **1:4:** Rom 1:8-9 ✨ **1:6:** Plp 1:9; Kol 1:9

mebäri mebäri Kristo-kät kentänpän yäpmäk takamän ŋonitā pen yäpmän yäpmän kunayän takamän unita kaŋ nadāwi tumbut.

7 ✧ Tänpäkaŋ notnapak, gäk Anutu täŋo kudupi ämawebenyeta iron täŋ yämiŋiri oretoret tāk tākaŋ. Ude täŋiri manka biŋam nadänpän näk imaka, bänep oretoret pähap tänpän bänepna pidämtak täyak.

Piremontä Onesimus äneŋi imagutta man

8 Eruk Piremon, gäk Kristo wäpi terak notnapak ude itan unita imaka kubä gākä täga tänaŋi u tākta täga peŋ gäweret.

9 ✧ Upänkaŋ gäka nadän gamikinik täyat unita piä u tākta jop gäwet yabätat. Gäk näkŋo mebärina nadātan; Näk tägawani, ba apiŋo näk Kristo täŋo piä tāk täyat unita yänpän komi eŋi gānaŋ itat.

10 ✧ Unita nanakna Onesimus ŋo täŋkentän imikta gäwet yabänjira käwep nadän namen. Nadātan? Näk komi eŋi ŋo gānaŋ irira Onesimus uwä ahän namänpän näkä Anutu täŋo man iwetpän iwonjäreŋira Anututa nadäkinik täŋkuko unita nani ude täyat.

11 Bian äma uwä piä säkgämän kubä nämo täŋ gamiŋkuk. Upänkaŋ bänepi yäpmän äyänutkuko unita apiŋo gäkkät nekta piä säkgämän-inik täga api täŋ nimek.

12 Unita apiŋo Onesimus tewa äretak. Äretak uwä bänepna gämäni.

13 ✧ Butewaki, Onesimus u näkkät bok itnaŋi. Näk Anutu täŋo manbiŋamta yänpän komi eŋi

gänaŋ irira u gäk wäpka terak täŋkentäŋ namik täyek.

14 ✧ Upäŋkaŋ näkŋaken gärip nämo iwarayäŋ. Gäkä täga yäŋ yäwikaŋ uyaku bok täga itkäde. Unita apiŋo gäkken tewa äretak. Näk ŋode nadätat; Iron kädet näkä peŋ gäwerira täŋpayäŋ täno uwä tägainik nämo. Täŋ, gäkŋaken gärip terak täŋpayäŋ täno uyaku säkgämän.

15 Täŋpäkaŋ duŋ-weŋpäŋ Onesimus-kät ek kadäni keräpita inigän inigän itkumäno u mebäri ŋodeta käwep; U äneŋi gäkken ärewänkaŋ bok pen api itdeŋo unita.

16 ✧ Uwä gäkŋo piä äma jopi ude äneŋi ittagän nämo. Nämoinik. U irepmitpäŋ notkapak säkgämän ude itta api ärewek. Nadätan, näk äma unita notnapak bureni yäŋ nadäŋpäŋ gäripi nadätat. Täŋ, gähä udegän äma unita gäripi pähap api nadäŋ imen. U piä ämaka irirän gäripi nadäŋ imayäŋ täno ugän nämo. U Ekäni wäpi terak notkapak bureni-inik irirän gäripi nadäŋ imikinik api täŋpen.

17 Unita gäk näka Ekäni wäpi terak nägät moräkna bureni yäŋ nadäŋpäŋä, Onesimus ŋo not säkgämän kaŋ täŋ imi, näka not täŋ namayäŋ täno udegän.

18 Täŋpäkaŋ Onesimustä goret kubä täŋ gamiŋkuk ba gäkŋo imaka kubä jop yäpuko täŋpänä eruk näweriri näkä kowata api täŋ gamet.

19 ✧ Näk bureni gäwetat. Man ŋo näkŋa ketnatä kudän täyat unita nadä; Goret täŋkuko unitäŋo kowata näkä api däpmäŋ tärewet. Täŋpäkaŋ ŋode nämo nadätan? Gäk kumäkta biŋam itkunopäŋ

✧ 1:14: 2Ko 9:7, 1Pi 5:2 ✧ 1:16: 1Ti 6:2 ✧ 1:19: 1Ko 16:21; Gal 6:11

näkä gäwetpäŋ gäwoŋärek täŋira Ekänita biŋam täyan unita gäk kowata täŋ naminanŋi bumik.

²⁰ Unita notnapak, Ekäni wäpi terak nek kubägän itkamäk unita täŋkentäk kubä nam yäŋ nadätat. Ude täŋ naminiri Kristo wäpi terak bänepna pidäm tawän!

²¹ Näk nadätat, gäk näkŋo man api buramiweno unita man ŋo kudän täyat. Ba imaka täŋ namikta yäŋapitat ŋo irepmitpäŋ säkgämän kubä api täŋpen yäŋ nadätat.

²² ✧ Täŋpäkaŋ gäripna ŋode pätak; Anututä gäkŋo yäŋapik man nadäŋ gaminpäŋ täŋkentäŋ naminirän näk gäkken täga ärewet. Unita näkä itta, eŋika-ken bägup täŋkireki kubä kaŋ peŋ nam.

²³ ✧ Eruk, tärek-tärek u ŋode; Epafrastä ganiŋ oret man pewän äretak. U Jesu Kristo täŋo piäta yäŋpäŋ näkkät komi eŋi gänaŋ bok itkamäk.

²⁴ ✧ Ba täŋkentäknaye Mak, Aristakus, Demas-kät Luk unitä udegän gäwetkaŋ.

²⁵ Täŋpäkaŋ Ekäninin Jesu Kristo täŋo bänep irontä bänepka-ken itinik täyon.

✧ **1:22:** Plp 1:25, 2:24 ✧ **1:23:** Kol 1:7 ✧ **1:24:** Kol 4:10,14, 1Ti 4:10-11

Tuma-Irumu
The New Testament and portions of the Old Testament
in the Tuma-Irumu Language of Papua New Guinea
Nupela Testamen na sampela Olpela Testamen long
long tokples Tuma-Irumu long Niugini

copyright © 1997, 2011 Wycliffe Bible Translators, Inc.

Language: Tuma-Irumu

Translation by: Wycliffe Bible Translators

Contributor: Wycliffe Bible Translators, Inc.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-05-03

PDF generated using Haiola and XeLaTeX on 3 May 2025 from source files dated 3 May 2025

914cbf46-f59a-54d1-b209-0f763534edb5